



Trotzchöpf 1983

CLIQUE LIESCHTEL

Sujet 2001: "Ei du schöni Sumpfhuehnjagd!" Moorhuehnjagd ufem PC

En PC, es Modem oder ISDN, das hett hüt jo bald scho jede Senn.
Das bruchsch nämlich, wenn de wetsch INN sy bym Internetsörfe und abelade, oder ebe wenn de wetsch Moorhühener jage.

Es git bald uf jedem PC es Spiel, das syg schynts der Hit. Chasch Hühener abegnalle, soviel de wetsch.

Die Hühener fliege übere Bildschirm innere Moorlandschaft, ganz noch aber au wyt, an ihrem Gegakker a si die no ganz fit.

Jetzt aber los, d Flinte lade und afo balläre, us de Lutschprücher ghörschs numme so schallere.

S git wenig Pünkt wenn de die ganz vorne breichsch, besser gknallsch uf die ganz hinde, bevor si hinderem Wald verschwinde.

Ganz hinde im Bild isch au es Stedtli mit emene Chirchturm, dört hani welle uf d Glogge chnalle und plötzlich ischs mer wie Schuppe vo de Auge gfall. Das Städtli dört hinde isch jo Lieschtel, s isch kei Illusion by eus isch die ganzi Moorhuehn-Invasion.

Also jetz wei mir doch lose was sone Moorhuehn cha verzelle, was es alles gseh het by dene Gselle, wo sich Lieschtler nenne.

Bym überfliege vom Rothuus gseht me dr Stapi mit sym Gefolge und hindedra s Erika, die gueti Fee, die willi emol us der Nöchi gseh.

I bi also glandet ufem Stadtsaaldach ganz hinde, denn hani se grad mit de Rollerbleed gseh verschwinde.

Dur d Gäng dure bini gwatschlet und ha mi fascht verirrt, hejo s isch fascht alles umschtrukturiert und andersch organisiert.

Wennde öpper suechsch, muesch zerscht die neu Funktionsbezeichnig gkenne, sunnscht duesch di in der Tür verrenne.

Zletscht hani no welle go d Stapo bsueche, aber au die hani müesse sueche und doch nyt gfunde. I ha denn verno si syge mit ihrem Chlapf uf ere Ehrerunde und welle go luege wo si wei ihre Radar plaziere, dä muess jo schliesslich au rändiere.

Ich gang jetz wyter i ha gnueng vo der Verwaltig gseh, s isch wie überall, jede weisses besser und meint er haig Rächt, derby isch er numme e chlyne Chnächt.

Jetzt hani Durscht ich will ine Beiz, als Sumpfhuehn umedüse hett sy bsundere Reiz. Immene grosse Boge bini über d Sichterä gfloge und was gsehnich do by däm Beize-Rekognoszierigsflug, in Richtig Sichterä isch jo e richtige Alpufzug. Die vereinigte Senne hei s Brüggli und s Kanonechügeli verloh und wei vo jetzena in der Sichteräbeiz hinterem Trese stoh.

S Brüggli isch jetz zue und blybt für immer gschlosse, der Tüller Pauli gsehsch au nümme bsoffe, der "Bursin" muesch nöime andersch go drinke und bym Neuhüusli deuje d Ratte winke.

Ei Liechtblick hetts ge in der Lieschtler Beizeszene, es git jetz nämlich "s Beizli vo dr Vrene". Wenn de Glück hesch chasch dört au mit em Tschirggi plaudere, wenn er nit grad inere andere Beiz duet ume-schwaudere.

Ich gang jetz wyter via Amtshuusgass und Züghuusplatz in d Meyer-Wiggli-Stross, dört isch im Ziegelhof öppis los. S isch e riese Fesch mit villne Gescht und Bsuecher usem halbe Kanton, wo chömmen cho lose was die Brauergelle vo ihrer 150-jährige Biertradition verzelle. Ich ha Glück und verwütsch zum Schluss none Zwickel direkt usem Fass, s isch eifach e Gnuss.

In der Gasschtross gsehni vo obe dr Karrer mit zwee Ywohnerröt und emene Boudepp umerenne, s isch wirklich wohr, die si emol nit am penne. In de Händ träge si Plän und Berächnige ume, die träume sicher scho vom J2-Halbaschluss, däm Chrumme!

Au bym überfliege vo der Rothuusschtross, em Wasserturmplatz und em Ängel hani mi müese froge, cha me das wirklich numme no gniesse vo obe? Dr Mühlyse Felix bloggt der Lärm und der Gschtank und ufem Bahnhofplatz findsch nit ei suuberi Bank.

D Strosse si verschtopft mit Blächlwinde und Kreisel hei mer e keine, nit emol nummene chleine!!!

Mir Sumpfhühener meine, do mues öppis passiere! Zerscht müese mer emol alli Brämser eliminiere, denne die wo scho lang nüt me gmacht hei pensioniere. Jetzt cha me alles was projiziert, bewilliget aber schubladiert isch wieder aktiviere und realisiere. S Ziel isch scho bald wieder in eusere Sumpflandschaft chönne go flaniere.

So jetz höre mir aber uf mit brichte vo dene sumpfige Gschichte, mir gniesse drey Däg eusi verkehrsfreye Watschelflächene und si richtigi Gniesser, hoffentlich traffe mir keine Spiesser!

Wie allewyl isch am Fasnechtszischdig d Latärne-Usstellig im Alte Züghuus vom zwöi zmidag bis am nünzi zobe!

Eimolig gits das Jahr e "Trotzchöpf-Bar" an der Amtshuusgass! Lueg au emol yne, mir hai offe am Sunntig, Mentig und Mittwuch.